

## 1 Observer utschels in üert

2 Zuppo davous üna fnestra as po que observer il cumportamaint dals pü differentes  
3 utschels fich daspera. La cumposiziun da las spezchas dependa da la situaziun  
4 geografica, dals contuorns pü strets e natürelmaing eir da la stagiun: L'utuon svoulan  
5 ils utschels migrants vers il süd in lur quartiers d'inviern e tuornan pür darcho la  
6 prümavaira. Pella peja passaintan giasts dal nord l'inviern ill'Europa Centrela.

7 Na adüna nu's laschan ils utschels observer suot cundiziuns optimelas. Els sun  
8 adüna in muvimaint, suvenz cuvierts da föglia e ramma ubain uschè dalöntschi  
9 davent cha que nun es bod na pussibel da'ls cugnuoscher. Cò güda la  
10 cugnuschtscha da la grandezza e da la fuorma dals singuls utschels e dals segns  
11 characteristics da lur svoul. Merls e sturnels sun considerabelmaing pü grands cu  
12 fringuels e tschingallegras. Cun tschercher pevel ill'erva saglia il merl suvenz vi e no,  
13 il sturnel chamina percenter e do tar mincha pass üna stratta cun sieu cho. In oters  
14 cas es la maniera da svuler ün möd adatto per disferenzcher las spezchas. Be pochs  
15 utschels pitschens, traunter oter il sturnel, svoulan gualiv our. Tschingallegras e  
16 fringuels svoulan per regla in uondas.

17 La fuorma dal pical indicha la nudritüra preferida. Tar utschels chi maglian sems es il  
18 pical cuort e ferm, tar quels chi maglian insects cuort ed agüz. Ils magliatuot scu il  
19 corv nair haun ün pical pü lung, utschels da rapina scu il falcun haun ün pical in  
20 fuorma da cröch.

21 Il clam ed il chaunt sun characteristics pels utschels. Il clam d'utschè consista be dad  
22 ün u da pochs tuns ed es suvenz sumgiaint tar differentas sorts. Cul clam d'alarm  
23 averteschan utschels a lur cumpagns. Tar ils utschels giuvens s'oda il clam da  
24 batlager. Pü vario cu'l clam es il chaunt. El es per part do da natüra e l'utschèin il po  
25 imprendder fin a la perfecziun. Il chaunt es da grand'importanza in connex cul temp da  
26 multiplicaziun. Dadour quel temp chauntan be pochs utschels. Cul chaunt  
27 signalisescha il mes-chel sieu revier ed avertescha a cumpagns masculins da nun  
28 entrer. A listess temp clama el a las femnas chi svoulan speravi. Il pü suvenz  
29 chauntan ils utschels la damaun a bunura. Vers mezdi glivra il chaunt e crescha  
30 darcho vers saira. Il temp precis, cur ch'üna spezcha cumainza a chanter, dependa  
31 da la stagiun e da l'ora.

32 Nus umauns vains plaschair dal muond plain culuors dals utschels ed ans allegrains  
33 da lur tschüvlöz e lur cumportamaint allegraivel. Quista descripciun nu correspuonda  
34 però a la situaziun dals utschels, perque ch'ella resulta d'ün penser umanisant. La  
35 vita dals utschels sto suot l'insaina dal cumbat per l'existenza. Prüma stu mincha  
36 utschè partir aint bain sias forzas, siand cha que do da fer bgeras chosas: procurer  
37 per nudritüra, fer gnieu, proteger e chürer il cuaditsch, s-chatscher ad inimihs e  
38 surviver düraunt invierns fraids. Seguonda as rechatta ün utschè in üna situaziun da  
39 concorrenza veementa, siand cha sieus cumpagns haun ils listess problems.

40 Ils mes-chels da bgeras spezchas d'utschels as muossan al cumanzamaint dal temp  
41 da multiplicaziun cun pennas glüschantas e culuridas in maniera speciela. Cun  
42 differents tuns clama il mes-chel a la femna in sieu revier. Tar bgers utschels as po  
43 que observer cha'l mes-chel pevla a la femna düraunt quist temp. Cur ch'ün partenari  
44 ho accepto a l'oter, sun dedas las premissas pella multiplicaziun. L'alach düra tar  
45 noss utschels in generel be fin a la fin da la perioda da cuer.  
46 Il cumportamaint da fer gnieu es ierto e tipic per mincha sort d'utschels. Utschels chi  
47 cuan in fouras tscherchan ün'avertüra in ün bös-ch vöd u üna foura in ün mür.  
48 Exposts a prievels pü grands sun gniews chi vegnan construieus i'l liber. Cuntrari als  
49 utschels, chi cuan in fouras, nu sun ils övs da quels utschels bod na visibels. Els sun  
50 per part taclos u na da disferenzcher dals contuorns pervi da lur culur.

51 Ils utschèins sun dependents dal gnieu. Cur ch'els vegnan our da l'öv, sun els orvs e  
52 nu's paun güder sves. Lur preschentscha pretenda üna granda müdeda da  
53 cumportamaint dals genituors. Aunz stuvaivan els be cuer e volver ils övs per circa  
54 duos eivnas ed uossa haune da pavler als pitschens famantos; ün'activited  
55 strapatschanta chi'ls occupa bod sainza pos. Ün pêr da tschingallegras porta mincha  
56 di fin 650 voutas pevel per sieu cuaditsch. Ils pitschens creschan relativmaing svelte e  
57 multiplicheschan lur pais infra pochs dis. La granda part dals utschels cunagia il  
58 gnieu cun purter davent u travuonder ils excremains da lur pitschens. Inimihs u  
59 invasuors melvis vegnan suvenz attachos. Zieva circa duos eivnas cumainzan ils  
60 utschels giuvens a svuler e bandunan il gnieu per la prüma prouva. Ils genituors als  
61 pevlan auncha ün tempet ed als aviseschan ils prievels chi s'avician.

62 A s'oda suvenz opiniuns fich differentas, scha que saja bun da pavler als utschels  
63 düraunt l'inviern. Dal punct da vista biologic nu fo que dabsögn da'ls pavler. Ils  
64 utschels chi passaintan l'inviern tar nus s'haun adattos bain a la stagiun fraida. Cun  
65 pavler in tscherts lös as promovua la quantited d'utschels sün ün spazi pitschen.  
66 Uschè as paun malatias deraser bain. Da l'otra vart fo que plaschair a pitschen e  
67 grand d'observer utschels indigens. Pavler cun imsüra pera perque dad esser ün bun  
68 cumpromiss chi resguarda tuots duos puncts da vista. Pevel adatto sun sems da la  
69 flur sulagl u da chanv, flöchs d'avaina respectivmaing frütta, pomma, nuschs u charn  
70 zappeda (pels utschels chi maglian insects). D'eviter es pevel insalo scu  
71 charnpüerch u rests dal damanger, que nu fo bain al stomi dals utschels. Impü es  
72 que important da cunagir regularmaing il lö da pavler.

(tenor LQ, 19-9-2014)